

Y Gwir Anrhydeddus Michael Gove AS
Ysgrifennydd Gwladol dros yr Amgylchedd, Bwyd a Materion
Gwledig

28 Mehefin 2018

Annwyl Michael,

Adroddiad ar drefniadau llywodraethu amgylcheddol ac egwyddorion
amgylcheddol ar ôl Brexit

Yn ddiweddar, cynhaliodd y Pwyllgor Newid Hinsawdd, Amgylchedd a Materion
Gwledig waith ar y trefniadau llywodraethu amgylcheddol a fydd eu hangen ar ôl i
ni adael yr Undeb Ewropeaidd. Mae adroddiad ar ein casgliadau ynghlwm.

Byddwn yn ddiolchgar pe gallech ystyried yr adroddiad ar ein gwaith fel rhan o'ch
ymgyngoriad ar 'Egwyddorion Amgylcheddol a Llywodraethu ar ôl Ymadael â'r
UE'¹.

Nododd y Pwyllgor y datganiad a gyhoeddwyd gan Lesley Griffiths AC,
Ysgrifennydd y Cabinet dros Ynni, Cynllunio a Materion Gwledig, pan gyhoeddwyd
eich ymgynghoriad². Dywedodd ei bod hi'n 'siomedig' nad oedd Llywodraeth
Cymru 'wedi cael y cyfle i drafod' o ran y gwaith a arweiniodd at gyhoeddi eich
ymgyngoriad. Aeth rhagddi i ddweud bod 'Cymru'n parhau'n barod i gydweithio'
â Llywodraeth y DU.

Roedd ein rhanddeiliaid yn glir bod angen sefydlu corff newydd i gyflawni'r gwaith
rheoleiddio a gorfodi y mae sefydliadau Ewropeaidd yn gyfrifol amdano ar hyn o
bryd. Tynnwyd sylw at yr angen brys i osgoi 'bwlch llywodraethu' ar ôl i ni adael yr

¹ <https://consult.defra.gov.uk/eu/environmental-principles-and-governance/>

² https://twitter.com/wgcs_rural/status/994600433590132737



Undeb Ewropeaidd (UE). Mae'r Pwyllgor wedi argymhell, os caiff corff o'r fath ei sefydlu ar lefel y Deyrnas Unedig, dylai fodloni'r meini prawf canlynol:

- rhaid iddo gael ei gynllunio ar y cyd gan holl wledydd gwahanol y DU;
- rhaid iddo fod yn atebol i ddeddfwrfeydd, yn hytrach na llywodraethau;
- rhaid iddo gael adnoddau priodol; a
- rhaid wrth fecanweithiau priodol er mwyn datrys anghydfodau.

Rydym hefyd wedi argymhell, os caiff ei sefydlu, y dylai corff llywodraethu o'r fath fod yn gyfrifol am y swyddogaethau canlynol:

- hyrwyddo diogelu'r amgylchedd ymysg gweithredwyr y llywodraeth a'r gymuned ehangach;
- monitro ac adrodd ar gynnydd wrth weithredu cyfreithiau amgylcheddol a darparu data gwyddonol hanfodol;
- cymryd camau lle na chyrhaeddir targedau/amcanion, er enghraifft trwy osod cosbau economaidd;
- rhoi i ddinasyddion a sefydliadau cymdeithas sifil fynediad at y systemau cwyno a gorfodi; a
- mabwysiadu strategaeth bolisi hirdymor sydd y tu hwnt i'r cylch gwleidyddol.

Yn yr adroddiad, cydnabu'r Pwyllgor ei bod hi'n annhebygol y bydd corff olynol ar waith erbyn y diwrnod yr ymedy'r DU â'r UE. Credwn y dylai Llywodraeth Cymru a Llywodraeth y DU drafod y potensial am drefniant trosiannol i sicrhau y gellir arfer swyddogaethau rheoleiddio a gorfodi mewn perthynas â chyfraith amgylcheddol.



Dylai'r trefniadau dros dro hyn fod ar waith hyd nes y gellir sefydlu corff olynol addas, naill ai ar lefel Cymru neu ar lefel y DU.

A allwch chi roi gwybod i ni a yw eich adran yn gwneud unrhyw waith i sefydlu'r trefniadau trosiannol angenrheidiol hynny?

Edrychwn ymlaen at weld canlyniadau'r ymgynghoriad gan obeithio y bydd ein cyfraniad yn helpu i lunio'r mecanweithiau gorau ar gyfer sicrhau y cedwir y warchodaeth amgylcheddol sydd gennym yn awr.

Yn gywir,



Mike Hedges AC

Cadeirydd y Pwyllgor Newid Hinsawdd, Amgylchedd a Materion Gwledig

